

Guangjshih Minzcuz Bau

ganhhau: CN45-0036 B.2017 Nd.12 Ng.6 liggaeuq dingyoux nienz ndwencib cibgouj

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3302期

Aenhoih Geiqniemh Gozvuyen Fatbouh 《Fueng'anq Sawcuengh》60 Hopbi Caeuq Byaujcangh Senhcin Hong Vahsaw Minzcuz Vunznoix Guengjsae Youq Namzningz Hai

纪念国务院颁布《壮文方案》60周年暨广西少数民族语文工作先进表彰大会在邕举行

Ndwen 11 ngoenz 29, Aenhoih Geiqniemh Gozvuyen Fatbouh 《Fueng'anq Sawcuengh》60 Hopbi Caeuq Byaujcangh Senhcin Hong Vahsaw Minzcuz Vunznoix Guengjsae youq Namzningz hai. Swcigih Dangiveij suhgi Bungz Cinghvaz camgya hai hoih, Swcigih cujsiz Cinz Vuj youq gwnz hoih gangjvah, caemhcaiq doengzcae fat ciengj hawj boux daiqbiuj ndaej ciengj.

Vahcuengh dwg vahcoj beksingq Bouxcuengh daihdaih yungh, hoeng youq duenh lizsij seizgeiz haemq raez he, Bouxcuengh cij miz vah, mbouj miz saw doengjit habfap. Bi 1957 ndwen 11 ngoenz 29, Gozvuyen baecinj 《Fueng'anq Sawcuengh》, caemhcaiq doengzeiq youq dieg Bouxcuengh doihengz yungh. Bi 1982 ndwen 3, Swcigih Cwngfuj goengboubh 《Fuenganq Sawcuengh (Anqcoih-cingq)》, laebdingh yungh 26 cih Lahdingh Cihmeh hingzsik daeuj geiqloeg caeuq raiz Sawcuengh, hawj 《Fueng'anq Sawcuengh》youq gwnz giekdae bauciz ndaej onjdingh miz gienzvi gaen ndaet yamqdin seizdaih baenaj, mboujduenh caeuq seizdaih caez baenaj.

Cinz Vuj cungfaen haengjdingh



▲Yienhciegz daihhoih.

Vangz Gwz Dwng Vaz ingj.

gij cingzcik daengx gih doicaenh hengzguh 《Fueng'anq Sawcuengh》aeundaej haenx. De naeuz, seizdaih moq doiq Guengjsae Sawcuengh Vahcuengh saehnieb hwnghat daez-ok iugouz moq, aeu caenh'itboub gyagiengz gij cwzyinganj caeuq sawj-minghganj guh ndei hong Sawcuengh Vahcuengh, aeu doeksaed gij cing-

saenz Cibgouj Daih dangj guh seizndei, doeksaed ndei minzcuz cwngcwz daegbied dwg gij cwngcwz vahsaw minzcuz, genhciz mbouj soeng guh ndei hengzguh 《Fueng'anq Sawcuengh》, mboujduenh doidoengh gij saehnieb vahsaw minzcuz hamj hwnj mbaeklae moq.

(bahlaj cienj 2 banj)

Denhdwngj Yen Guhsat Gij Hong Denyingj Vahcuengh Roengz Mbanj Hozdung

天等县完成壮语电影下乡活动任务

Daengz bineix ndwen 11 daej, Denhdwngj Yen gungh youq daengx yienh 54 aen mbanjungzhoj guhsat gij hong aen cawjdae hozdung dwg "denyingj Vahcuengh roengz mbanj, bangrenz cinjing bangfuz", youq banhaemh cuengqingj denyingj 54 ciengzbaez.

Vih cienzmienh doeksaed gij guhhong anbaiz daengx gih gven-daengz denyingj Vahcuengh roengz mbanj hozdung, bineix ndwen 11 co, Denhdwngj Yen Minzcunghgiz caeuq Denhdwngj Yen Daihdeih Dajcang Gvangigaubu ciemdingh, youz Aen Camhcuengqingj Denyingj Denhdwngj Yen Vwnzgyangigiz ciengzsaec son-

yinx, laebdae youq daengx yienh 54 aen mbanjungzhoj haiguh denyingj Vahcuengh roengz mbanj hozdung, cujyau cuengqingj 《Gij Gisuz Haeux-yangz Hableix Ndaem Deih Laisou》《Gij Gisuz Viq Biz Vaiznoh》daengj gohgyauben Vahcuengh caeuq 《Hoenx Manaez》《Aendingzdingj》daengj gij benqgojgaeq hoiz baenz Vahcuengh haenx, vunzlai yawjgonz daengz 1.6 fanh vunzbaez doxhwnj. Cuengqingj seiz, Denhdwngj Yen Minzcunghgiz venj fuk baengzhoengz miz Cuengh Gun song cungj saw 54 diuzbaez, fat cienndan、ceksaw iq、doxgaiq geiq-niemh daengj miz Cuengh Gun song cungj saw 5000 lai faenh.

Baez hozdung neix mboujdan fungfouq le gij neiyungz saedceij vwnzva seizhoengq vunzlai mbanjungzhoj, caenh'itboub cienzdoh le gohgi cihsiz, bangrenz gohgi bangfuz、dungxcaiz vut gungz, caemhcaiq fungfouq le senhconz caidij, baez daih'it yungh Vahcuengh roengz mbanj cuengqingj hozdung senhconz gij cwngcwz vahsaw minzcuz dangj, hawj engq lai vunz roxyiuj vah minzcuz, lij ndaej hawj vunzlai dox baedauq doxyungz, gyagiengz minzcuz doxgiet, henhoh ndawbiengz onjdingh, bangrenz hwnjguh aen biengz huzndei.

(Vangz Souciz/黄寿积)

SIUSIK DINJ

简讯

● Ndwen 12 ngoenz 1 dwg aen daih samcib "ngoenz bingh'aiswh seiq-gyaiq", Yungzsuij Myauzcuz Swciyen youq aen gvangjczangz aenvenz banh fuengz bingh-aiswh senhconz gyauyuz hozdung, doenggvaq fatcuengq senhconz swhliu、yienhciegz ciepsouh vunzlai camcaz caeuq yawj bingh hawj vunzlai mbouj aeu cienz, caenh'itboub daez-sang gij yisiz ancienz caeuq cangqheiq vunzlai.

(Gungh Siengzyouj)

● Ndwen 12 ngoenz 2, Lozcwngz Mulaujcuz Swciyen Anhgenhgiz Gunghvei caeuq aen dangcihbu bae Siuj-cangzanh Cin Lizsinh Cunh aen yienh neix lienzhaz haiguh cawjdae hozdung. Doenggvaq guh ciengj daengq、goemqnaq roq laz、bengcag doxdax daengj hozdung, caenh'itboub hawj song mbiengj gyalai doxgyau, gaenxmaenx caux ok gij heiq-faenh doxgiet huzndei、gaenx guh doxhwnj、gamj buek gamj guh, gikfat gij yiedcingz caezgya hwnjguh Mbanjmulauj gyaeunde vuenyungz.

(Liu Gvanghfuz)

● Ndwen 12 ngoenz 1, Ningzmingz Yen Gyauyuzgiz、Ningzmingz Yen Gungh'anhgiz Gyauhgingi Dadui lienzhaz haiguh ngoenz gyaudoeng ancienz daengx guk "122 doengh hwnjdaeu" gyaudoeng ancienz cihsiz doxdax hozdung, doenggvaq haiguh "ngoenz gyaudoeng ancienz daengx guk" soengq fap haeuj ndaw-hag hozdung, caenh'itboub daezsang le gyoengq hagseng hag、souj、senhconz gyaudoeng ancienz fapldw fapgi yisiz.

(Couh Yizganh Nungz Cidingz)

● Ndwen 12 ngoenz 2, aenhoih dinbyaij daengx guk youz Aen Hezvei Binbya Cungguk、Guengjsae Boux-cuengh Swcigih Dijyuzgiz、Baksaek Si Yinzminz Cwngfuj cawjbanh haenx youq Baksaek Si(Cingsih、Dwzbauj) hai, ca mbouj geijlai 500 boux boux-gyaez dinbyaij daj daengx guk 18 aen sengigih daeuj haenx camgya baez dinbyaij hozdung neix.

(Cangh Ailinz)